



Pou Piblikasyon Imedya: 13/04/2023

GOUVÈNÈ KATHY HOCHUL

GOUVÈNÈ HOCHUL ANONSE YO TE SELEKSYONE OTORITE THRUWAY POU SIBVANSYON FEDERAL 21 MILYON DOLA POU RESTORE PON CASTLETON-ON-HUDSON

Sibvansyon federal pwogram envestisman pou pon yo bay finansman pou dezyèm faz pon Castleton-on-Hudson an 2024

Pon Castleton-on-Hudson nan se yon konektè prensipal ant konte Rensselaer ak Albany epi li desèvi plis pase 6.2 milyon veyikil chak ane

Gouvènè Kathy Hochul te anonse jodi a ke yo te seleksyone Otorite Thruway (Thruway Authority) Eta New York la pou yon sibvansyon federal 21 milyon dola, nan kad [Pwogram Envestisman nan Pon](#) Administrasyon Federal Otowout Depatman Transpò (Department of Transport, DOT) Etazini, pou sipòte restorasyon Pon Castleton-on-Hudson sou New York State Thruway (I-90) Berkshire Spur. Gouvènè a te fè anons jodi a avèk Sekretè Buttigieg, Manm Kongrè Paul Tonko ak reprezantan lokal yo.

"Lwa Bipitat sou Enfrastrikti a te ban nou opòtinite pou nou adrese bezwen enfrastrikti enpòtan atravè Eta New York", **Gouvènè Hochul te deklare**. "Mwen remèsye Prezidan Biden pou angajman li pou envesti nan New York ak Sekretè Buttigieg paske li sipòte pwojè sa a pou retabli Pon Castleton-on-Hudson, modènize sistèm transpò nou an, ak ranfòse koridò ekonomik vital sa a".

Sekretè Transpò Etazini a, Pete Buttigieg, te deklare, "Lè yo gen pou fèmen pon yo pou reparasyon — oswa pi mal, lè yo kòmanse tonbe an pàn — sa ka koupe aksè a tout yon kominate, ajoute plizyè èdtan nan vwayaj, koute lajan pou biznis lokal yo, ak retade premye sekouris yo nan ka yon ijans. Sibvansyon yo n ap anonse jodi a ap ede kominate tout gwosè modènize pon yo pou otobis lekòl, kamyon livrezon, anbilans, ak vwayajè yo ka rive kote yo bezwen ale yo byen vit ak san danje".

Direktè Egzekitif Pwovizwa Otorite Thruway la, Frank G. Hoare, te deklare, "Mwen vle remèsye patnè nou yo nan Depatman Transpò Etazini paske yo rekonèt pwojè Pon Castleton-on-Hudson Otorite Thruway kòm yon benefisyè pou Sibvansyon Pwogram Envestisman nan Pon an, ak enpòtans kritik pou envesti nan enfrastrikti nou an.

Genyen sibvansyon federal sa a pral sipòte yon gwo pwojè konstriksyon kapital ki pral sèvi otomobilis nou yo pou plizyè deseni alavni".

Lidè Majorite Sena a, Charles Schumer, te deklare, "Pon Castleton-On-Hudson se yon konektè enpòtan anpil nan Distri Kapital la, men pandan plizyè ane enfrastrikti ki t ap degrade li yo te mete vwayajè yo nan Nò Eta a an danje epi te anpeche devlopman ekonomik. Se poutèt sa mwen tèlman fyè pou m bay 21 milyon dola atravè Lwa Bipatit sou Enfrastrikti ak Travay la pou retabli ak reyabilite konektè enpòtan sa a, kreye bon travay epi asire sekirite pyeton ak otomobilis nou yo. Finansman federal enpòtan sa a pral pwolonje lavi sèvis pon an sou plis 50 ane, ranfòse ekonomi Rejyon Kapital la epi pèmèt vwayajè yo deplase yon fason ki pi an sekirite ak pi pwoteje".

Senatè Kirsten Gillibrand te deklare, "Pandan twòp ane, Pon Castleton-on-Hudson te rete san reparasyon ki te nesesè anpil yo. Mwen fyè dèske m te goumen pou m adopte Lwa Bipatit sou Enfrastrikti ak Travay ki bay sibvansyon 21 milyon dola sa a pou modènize pon an epi rann li pi an sekirite pou tout moun ki konte sou li, epi mwen pral kontinye goumen pou jwenn lajan federal pou ka amelyore enfrastrikti k ap deteryore atravè eta nou an".

Reprezantan Paul Tonko te deklare, "Pon Castleton-on-Hudson lan se yon pati enpòtan nan enfrastrikti ki konekte kominate nou yo ansam, epi efò sa a pou garanti avni li se yon gwo viktwa pou rejyon nou an, rezidan yo ak vwayajè yo. Finansman sa a, ki te vin posib gras a envestisman san parèy nan Lwa Bipatit sou Enfrastrikti nou an, pral ede asire ke pon an rete an sekirite ak fyab pou ane k ap vini yo, sipòte deplasman machandiz ak moun nan Rejyon Kapital la ak pi lwen. Mwen fyè pou m rejwenn Sekretè Buttigieg ak Gouvènè Hochul nan anons finansman enpòtan sa a epi mwen espere kontinye travay nou an pou sekirize envestisman ki konekte kominate nou yo epi kenbe estati rejyon nou an kòm yon sant aktivite ekonomik k ap pwospere".

Senatè Eta a, Timothy M. Kennedy te deklare, "Pon Castleton sèvi kòm yon koridò vital pou komès, ki konekte pwen ant Eta New York ak Nòdès la, ak kominate lokal ki nan mitan yo. Plis pase 6.2 milyon veyikil travèse li chak ane, epi pandan plizyè dizèn ane, volim trafik sa a te fè dega. Pandan ete a, mwen te kontakte Sekretè Buttigieg pou m defann aplikasyon Thruway pou sibvansyon sa a, epi anons jodi a se yon lòt demonstrasyon patnè federal nou yo k ap travay pou enfrastrikti New York. Envestisman sa a pral vize dirèkteman reparasyon ki anreta, epi asire aksè kontinyèl nan koridò esansyèl sa a".

Otorite Thruway te aplike pou sibvansyon an nan ane 2022 epi Administrasyon Federal Otowout Depatman Transpò Etazini an te nonmen li kòm yon benefisyè. Pwogram Envestisman nan Pon an se yon pwogram konpetitif, diskresyonè ki konsantre sou reparasyon, reyabilitasyon, oswa ranplasman pon ki egziste deja pou redwi kantite ki nan move kondisyon oswa ki gen risk tonbe nan move kondisyon. Li elaji tou kalifikasyon aplikan yo pou kreye opòtinite pou tout nivo gouvènman yo se benefisyè dirèk fon pwogram nan.

New York State Thruway se yon otowout 917 kilomèt ki gen 815 pon, 118 echanjè, 27 zòn sèvis ak twa Sant Akèy epi konekte vil prensipal, zòn riral ak destinasyon touristik New York yo. Berkshire Spur se yon koridò ekonomik enpòtan ki konekte I-87 nan Konte Albany ak liy eta Massachusetts la.

Pon Castleton-On-Hudson nan, ke tout moun konnen sou non Pon Castleton (Castleton Bridge), te ouvri pou sikilasyon nan ane 1958 epi li gen yon longè ki apeprè yon kilomèt edmi, pandan li konekte seksyon Berkshire Spur a ak liy prensipal Thruway la. Apeprè 6.2 milyon veyikil chak ane oswa 17,000 chak jou sikile sou pon ki konekte konte Albany ak Rensselaer yo sou Rivyè Hudson nan. Pon Castleton lan gen 65 an epi li bezwen yon gwo envestisman kapital pou kontinye kenbe l pandan plizyè deseni k ap vini yo.

Yon pwojè 47.6 milyon dola sou Pon Castleton lan te kòmanse an 2021 ki gen ladan ranplasman teras vwa sikilasyon nan direksyon lwès yo, reparasyon teras vwa sikilasyon nan direksyon lès yo, ranplasman medyàn sant lan ak reparasyon asye pon an. Pwojè a prevwa fini nan fen 2023. Pwojè sa a se premye gwo reyabilitasyon sou sifas pou kondwi sou Pon Castleton depi 2009. An 2016 yo te repentire gwo bastengal asye yo epi ekip antretyen Thruway la te fè antretyen woutin regilyèman pou pwolonje lavi sifas pou kondwi a.

Sibvansyon Pwogram Envestisman nan Pon an pral konplete depans yon dezyèm pwojè pou ranplase teras pon an nan direksyon lès la epi adrese reparasyon asye ak karakteristik sekirite antretyen yo. Avèk achèvman de pwojè sa yo, lavi sèvis yo prevwa pou gwo estrikti a pral pwolonje jiska 50 ane.

Yo prevwa pwojè pou ranplase teras pon an nan direksyon lès la ap koute apeprè 44 milyon dola epi sibvansyon 21 milyon dola a pral aplike dirèkteman pou konpanse depans sa a. Yo prevwa kòmanse nan prentan 2024.

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418

[ANILE ENSKRIPSYON OU](#)